

EBEDEYON ISADAIDBON ISTE

Abi yacnoshon ambi uaidon Icbombo Esuquidistu nendac

1 ¹Ëndenquimboshë Nuquin Papan
ëmbi chiacpadomboen chuibanta cac
adomboembidi abëd icquido
tsusedpabon chuibanoapampic. Abentsëc
chuimeshun yuecshun ambi chiaid utsi
tsusedpa utsitsen chuimeoapampic.
Adoshombic yuecquiocshon ambi chiaid
utsitsen tsusedpa utsitsen
chuimeoapampic. Adembidi ambi abi
yacnoshon uaid mayan bëda budmiac
aidën chiacpadomboen tsusedpabon
chuiopampic. Adembidi
nadatiambocquin uabanquin ismequin
chiac adomboembidi chuiopampic.
²Nëbi tsyuecquio Nuquin Papan
chiacpadomboen abipadquiocquidëmbi
aton Madon chuibanec. Aidi Nuquin
Papan ambi uaido con icbo camiaidquio
nec. Nidaid abubëdta uashun
aidënquiocquidtedi aton Papabëdtan
uabanampidquio aton Madombo nec.
³Aidi, aton Papa bëdaidquio
yampidpadquidquiobidi aton Mado
neaic. Aton Papa yacpadquiocquin
ismequid yec ambi nadomboen natiad,
quequin nadatiambocquin ambi
tantiacpadquiequi nidaid abubëd
aidënquiocquidtedi adquiuidi iquec.
Aidi aton Papan chiaid niaquesambo yec
matses icsaid bedshunash abided
cuidadec unësash, Ëmbi bëdambocquid
icmebanaido matses nendac, quequin

tantiashic abuc nidoash Nuquin Papabëd
tabadoapanëdash aidquiobi. ⁴Ad icnuc
ambi abi yacnoshon uaido abipadquid
nibëdec. Aidon con Icbombo caidquio
nec. ⁵¿Ambi abi yacnoshon uaid mayan
bëda isec:

“Con mado mibi nec.

Ëbi min papa nendac, quepecta

Nuquin Papa iquec? Padenquio.

Adecbidi:

¿Nëidën Papa nebi.

Adecbidi: Con mado nec, quepecta

Nuquin Papa iquec aido caic?

Padenquio.”

⁶Abëd Abiambo Yampidi nidaidën
tabadash choasho isun Nuquin Papan
ismequin:

“Nëid con Madombo Abentsëqui
nec. Aidquio tantiec con Ico nec,
quec cuishon quec, ambi naid
chiec cuëdën, cac aden ambi abi
yacnoshon uaido mayan bëdabo
chuibanec cuëdëncuededendac.”

⁷Ambi abi yacnoshon uaido mayan
bëdabo naden Nuquin Papan chiec:

“Ëmbi chiacpadequi cunquequid
yanec.

Adecbidi, ëmbi chiacpadequi cuëte
nëdënquedote iquendac.”

⁸Padnuen ambi uacmaid abipadquid
aton Madombo utsi uatiapimbo iquec.
Adquidquio icsho Nuquin Papan naden
chiec:

“Ënenquiocquin ëbëdtan Chuiquid
Abentsëcquio mibi iquendac.

Adecbidi namequid bēdaidquio mibi iquendac.

⁹ Ēbipadquid iquec bēdamboec tabadquin nabante bunquidquio mibi nec. Adquid yec icsamboec tabadquin nabante bunesambobidi mibi nec.

Adquid yec ēbi yacpadquidquio Icbo Abentsēcquiobi mibi nec.

Mibēd icquido adquid nibēdec. Mibi abentsēqui adquidquio iquec. Adquid iquec, Bēdambo iquebi, quec mibi cuishon quendac.”

¹⁰ Adembidi Nuquin Papan naden aton Mado chuioaic,

“Tauamboen nidaid abubēdta uashun aidēnquiocquidtedi mimbi uabampampic.

Aidtedishun icbombo mibi nec.

^{11,12} Aidtedi ēnēdendac.

Mibien nibēdantiapimbo yec abi tabadendac.

Aidtedi dashcute shēnibudaidd niacimboen chuca uaindac.

Mibien Abiambo Yampid yec abi ēnēdesa mibi iquendac.

¹³ Nēbi cainec ēbēdquio tabadec cho.

Mibi chieshēnquidtedi nibēdquio icmenun nabono. Chiata,”

quequin Nuquin Papan chiampic. ¿Ambi abi yacnoshon uaido mayan bēda aden chuiampidta nepadic? Padenquio. Esuquidistu aden chuiampic. ¹⁴ Ambi abi yacnoshon uaido mayan bēdabo Nuquin Papan, Ēbēd tabadtequidombo nashunta, caido nec.

Ambi chiaid tantiesa icchitomane, queshun tantiadonequiota caid

2 ¹ Adec abitedishun Icbombo aton Mado icnuc ambi chiaid chieshēnchitomane queshun tantiadonequieq tabadnuna.

² Ēndenquimboshē ambi, Naden nata, quequin chiaid ambi abi yacnoshon

uaido mayan bēdabo chuimiapadomboenuidi naisa icsho isun Nuquin Papan cuidpampic. ¿Aden ēndenquimboshē ambi chiaid chieshēnquid ambi cuidpampicpaden ³ nēbi icquidtsen ambi chiaid chieshēnsho isun cuidenquioda icpadic? Ambi chiaid niacquid ambi cuidtiadquidi icnubi aton Madoded cuidpanēdash. Adoac, Ēbi yacno Yuedanquid nebi, quequin aton Madonquio Esusēmba chiambic adomboembidi abi tantiaquidontsen chuioapondashi. Aden Esusēn chiaid tantiaquidon chuibanubien, ⁴ Ēmbi chiaidquio chuibanaopec, quequin ismenuequin aton Mayanēn Nuquin Papabēd icquidēn tantiamebanacpadomboen nadatiambocquin utsi-utsien bēdamebanquinc, mayan icsa dapuededmequinc, unēsaid uincuemequinc caquin adquidēn-adquidēnquien nabadepanēdash.

Matses icnu quiaish Esuquidistu matsespanēdash

⁵ Adembidi chuinu. Tantiata. Abi yacno Esuquidistu tantiaquido choash tabadsho isun, Nēido ēbi yacnoshon ēmbi uaido mayan bēdabo mibi chuiquid nec, quenquio Nuquin Papa iquendac. ⁶ Ēndenquimbo aden tantiaquin dada uaquin naden Nuquin Papa chiec Dabid pado onquepampic: “Tantiaquiono. Ēbi chui, Papa.

¿Atotsieshun matses mimbi uaid pistsēcquio icsho mimbi comapenen tantiatequid aido icpec? Papa. Adembidi, ¿Atotsieshun Adanēn tsyuecquido mimbi nashumpe? Papa.

⁷ Nēbi chuitan mimbi cac mibi yacnoshon uaid mayan bēdan

adomboembidi chuioac matsesën
nabanec.

Yuecquiocshon mibipadquid matses
mimbi icmendac.

⁸ Adquid icmeshun mimbi
uaidtedishun icbombobidi aid
mimbi icmendac,”

quequin abimbo chiampid nec. Nēbi
abitedishun icbo matses mimbi
icmiambo iquec. ⁹Utsien Nuquin
Papapadquidquo yequi matsesun
Nuquin Papan tantiamiacpaden ambi
abi yacnoshon uaido mayan bēdabon
chiac nabamboedi nēbi aton Papabēd
tsadec abitedishun Icbombo yanac. Aidi
Nuquin Papan chiacpadomboen nanuec
nidaidēnshun tishac matsesash matses
tantiec matses icsaid bedshunash abided
cuidadec unēsash abitedishun Icbombo
yampanēdash.

¹⁰Nuquin Papa abitedi uaquidquo
icnuc ambi tantiacpadec iquec. Adquid
icquin ambi, Matses icsaisa icmeshun
con bacuē icmembi, quequin
tantiacpaden ēbi yacno abi tantiaquid
yuedquid con Madombo iquendac,
quequin ambi chiampicpadquiequi aton
Mado matsespanēdash. Aidi matses yec
natiacpadquiequi icsaisa yec unēsash
uincuenash bēyucanec abi yacno
dectatonepanēdash ma Nuquin Papan,
Matses con bacuē icmembi, quequin
tantiado ēbi tsibanec dectatonepanu
quiash. ¹¹Matses bēdambo icmequid
Esuquidistun Papa ambi bēdambo
icmebantequidon Papabidi nendac.
Aton Papa Abentsēqui icnuc
Esuquidistu Nuquin Papa yacno choash,
Con utsibo nec, quependac ¹²aton Papa
chiec:

“Mibi chuiquin con utsibo
tantiamenu, Papa.

Aidobēd tabadquimbi mibi chuinu.
Tantia, Papa, quependac.”

¹³Adembidi chuioaic:

“Mibi tantiaquin mimbi
chiampicpadomboen nabanash
choaobi, Papa.

Ēbi tsibantequid mimbi bēdaidquo
icmiaisquid bēc choaobi,
quequin mibi chiendambi, Papa,”
quequin matsesabi yec abuc tabadquin
Esuquidistun chuipampic.

¹⁴Matses namibēd intacchoquid yec
unēstequid icsho mēnchicquid icnu
quiash Esuquidistu matsesash
unēstequid yampanēdash. Ma matses
mayan icsan dacuēdmequin
dēcatemēntiapimbo yampanu quiash
matsesash unēstequid yampanēdash
¹⁵ma mayan icsan ambi dacuēdmiaido
ambi yuaido icboedi matses ēmbi
mēnchictequid ma icpanuna. ¹⁶Ēmbi
uaido mayan bēdabo unēstequid icsho
mēnchicnu, quenquo yec matsesash
Esuquidistu unēsapanēdash. Abadauanēn
tsyuecquido mēnchicnu, quiash
matsesapanēdash. ¹⁷Aden ambi
chiacpaden nanuec matsespadquid
yampanēdash. Adece matsesash matses
nēnacpadquiequec nēmpañēdash. Abi
bundoacpadquiequec bundopanēdash. Abi
natiacpadquiequec natiatequid icpanēdash.
Mayan icsan icsamenuequin tanaidbidi
icpanēdash. Matses yanash icsaisa yec
matses icsaid bedshunash abided
cuidadec unēsapanēdash matses Nuquin
Papan bēdamboen istequid icmenuec.
Adecbidi, Matses icsaisa yanabi yec
chuiabanec Nuquin Papabēd
onquetiapimbo iquec, quec matses
chuiabanec Nuquin Papabēd aidi onquec.
¹⁸Matsesacsho mayan icsan: Nuquin
Papan chiaid niacmenu, quequin tanac
niaquesa Esus icpanēdash. Adquid
icquin nuquitsen mayan icsan: Nuquin
Papan chiaid niacmenu, cac,
Chieshnushe ēbi dayacquio icmec cho,
cac badedquo choquin chieshesa nuqui
icmendac.

**Abi yacno yuedanquidquio icquin Moises
dëniacquid Esuquidistu**

3 ¹Adec matses icsaid bedshunash abided cuidadaid Esuquidistu tantiaquido aton shubun icquido nec. Adquid icquin Nuquin Papan, Ēbi chuibeneta, cashumbic adembidi ambi matses chuibanec ëbëd onquequid dapa icoata caid Esuquidistu nec, quequin aidquio tantiaquionona. ²Nuquin Papan chiacpadomboen chieshenquiocquin naquido Nuquin Papan shubun icquido abi tantiaquido iquendac, quequin Moisesën chuided-chuidedampicpaden Esuquidistun adomboembidi chuibampanëdash. ³Aidi Abiambo Yampid yec, Ēbi tantiaquido con shubun icquido nendac, Esuquidistu quiacpadec adecbidi adtiapimbo Moises icoapampic. ⁴Nëidted con shubun ëbëdi tabadendac, quequid shubu icbo nec. Aden Nuquin Papan chiacpadomboen aton shubun icquido bëdamboquid icmequid Esuquidistu nec. ⁵Nuquin Papan shubun icquid ambi namiaidquio Moises icquin Nuquin Papan: Matses con shubun icquido icmequid iquendac, quequin min matses chuita, cacpadomboen chuiquid Moises icpampic. ⁶Esuquidistu Nuquin Papan Madombo yampidquio aton Papan shubun icquid icquin aton Papan Moises chuimiampicpaden aton shubun icquido icmepanëdash. Aidën shubun icquid nebi, qeshun chieshenquiocquin cainquidquio aton shubun icquidquio nuqui nendac.

Chieshenda

⁷Aton shubun tabadnuequid naden Nuquin Papan Mayanën ambi chiaid mibi bëdamboen tantiamenuen chieque. Tantiata:

“Nëbimbobi Nuquin Papan chiaid chieshënenquio yec tabadta.

⁸Equipito yacnoësh cuëte nibëdacno capuquin tsusedpabon, ěNuquibëdida Nuquin Papa iqueque? Tantiabono, qeshun ambi chiaid chieshëmpampicpaden chieshënenda.

⁹Cuëte nibëdacno seta 40ted matamec capucuenequin tsusedpabon Nuquin Papan nadatiambocquin naded-nadedsho isquimbi ěAmbi chiaid niacshoda Nuquin Papan ëbi cuidpeba? Isbono, quiacpadquiec tsusedpabo icsamboec tabadpampic.

¹⁰Adec tabadsho isash nëishpondabi. Ēmbi chiaid chieshënec ambibi tantiacpadequi icsadenepampic.

¹¹Adquid icsho isun chushcain: Ēmbi abitedi uabanquin nainash ëbi tabadacno aidtedi puduedmenquio iquembi, quequin chiacpadomboen naindambi. Abimbo caimbi,”

quequin Nuquin Papan isadaidbo chiampid nec.

¹²Abiambo Yampid Nuquin Papa abi iquec, quequin tantiash cuëshëdchitomane qeshun tantiadonequiota. ¹³Nuquin Papan chiacpadquiec tabadnuna, quec badiadquidën-badiadquidënquiec chuinanec onqueta ma adoac icsamianquidën chiac Nuquin Papan chiaid chieshënenquiocpanuna.

¹⁴Esusbëd icquid nebi, quiondacpaden tantiadenequin caimbudec aton matses yec Esus yacno nidanetequidquio mibi nendac. ¹⁵Nuquin Papan chiampid utsitsen chuinu. Tantia:

“Nëbimbobi Nuquin Papan chiaid tantesa uampicpaden tantesa uaina.”

¹⁶ĚTsuntsin Nuquin Papan chiaid tantiashun chieshëmpampic? ěEquipito

yacnoshon bëyucanquin Moisesën buanaido Nuquin Papan chiaid tantiash chieshquido yanenquioda icpampic? ¹⁷¿Tsutsibidi seta 40ted matamec chiesho isash Nuquin Papa aidtedbidi seta matamec nëishted-nëishtedpampic? Adoac ¿Cuëte nibëdacnoësh icsaquitedi unësbudnenquioda icpampic? ¹⁸¿Abitedi uabanquin nainash ëbi tabadacno puduedmenquio iquembi, quequin tsutsi Nuquin Papan chuiampic? ¿Ambi chiaid chieshënkuid Nuquin Papan chienquioda icpampic? ¹⁹Ai, tsusedpabon Nuquin Papan chiaid tantiash, Bëdambo iqueque. Adonona, queboedombi, Nuqui nabocpadomboen nanuna, quequin ambi chiaid chieshënshe Nuquin Papan abi yacno puduedmetiapimbo icpampic.

**Ëbi yacno puduedash ëbëd
tabadtequid quiaid**

4 ¹Ëbi yacno puduedash ëbëd tabadtequid iquendac, quequin Nuquin Papan chiampicpadomboen nëbimbobi chuioaïque. Abi yacno abëdi ictiapimbo icchitomane quequin Esuquidistu tantiadonequionona. ²Ëbi yacno puduedash tabadtequid iquendac, quequin ëndenquimboshë Nuquin Papan nuquin tsusedpabo chiampicpadomboen nëbi nuqui chuioaic. Aden ëndenquimbo chuisho tantiash, Nuquin Papan chiaid abimbo iquec, quiaish tantienquio yanash, Aid cainu, quetiapiimbo tsusedpabo utsi-utsiec yampampic. ³Ambi chiaid tantiaquidomboen nëbi aïdbëdi tabadec.

“Ënden yampidon tantienquiocsho isash, Abitedi uabanquin nainash ëbi tabadacno chotiapiimbo aïdo iquendac,”

quequin chushcaquin Nuquin Papan aden chuiampic. Tauamboec ambi tantiacpadomboen abitedi uabanquin

nainash Nuquin Papa quenenash tabadpampic. ⁴Abi tabadaid chuiquin Nuquin Papan naden dada uamiamnique. Tantia: “Seistedec ushqin abitedi uabanash badiad utsin ënash tabadpobi.” ⁵Ashumbic nadentsen dada uamiampic:

“Ëbi ënash tabadacno ëmbi chiaid chieshënkuido chotiapiimbo iquendac,”

quequin chuiampic.

⁶Aden chuimiad ëndenquimboshë ambi chiaid tantiesha icquin niac-niacquec Nuquin Papabëd tabadtiapiimbo icpampid icnubi ambi chiacpadomboen naquin caimpampidobëd nëbi nidaïd utsi-utsiec icquido Nuquin Papabëd tabadtequid nendac. ⁷Ambi tantiacpadën Nuquin Papan chuimiapaden Dabid padon: “Icsachitomane qeshun Nuquin Papan chiaid tantiaquiota,”

quequin dada uapampic. ⁸Chuiquid dapa Dabid tishambocnoc Equipito yacnoësh nidaïd Canan yacno abi chuiquid dapa Osuebëd isadaïdbo cho-chopampic. Capuec ënëdash nidaïd Canan yacno cho-choash isadaïdbo ënëdenquio yec tabadte icnuc, Ëbi yacno ënëdenquio yec tabadte iquendac, quequin Canan yacno choash tabadquidon tsyuecquid Dabid pado Nuquin Papan chuimenquio ictsenampic. ⁹Aden Dabid pado chuimiad tantiash abi tantiadonequidombo Nuquin Papabëd tabadquido nendac. ¹⁰Aden uabanquin nainash Nuquin Papa tabadacpadec ambi bëdambo icmenuequin tantiactedi nabanquin nainash aïdbëdi tabadendac.

¹¹Nuquin Papabëd tabadnuequin ambi tantiacpadec icnuen nainu, qeshun Esuquidistu tantiaquionona. Nuquin Papan chiaid tantiesha yanash tsusedpabo puduedenquiocpampicpadec icmane qeshun adonona.

¹²Nuquin Papan chiaid ambia chuiampidquio abi iquec. Nadatiambocquin tantiamete ambi chiaid nec. Shocosh siante abiuc daëdi cuënumbocquidën siaid uquëduc sënquin nami icsaid isendac. Adomboembidi Nuquin Papan chiaid chiac papuduedquin matsesën tantiaidtedi uquëduc sënaid isacimbocnuc abi icsaid tantiamendac. Ambi, Naden nanuna, quequin chiabi yaidtedi abi bunquin ambi chiabi yaidtedibidi matses tantiamequin naden: Mimbi tantiaid icsa nëid icnubi mimbi tantiaid utsi bëdambo iquec. Adecbidi, mibi bunaid icsa nëid icnubi mibi bunaid utsi bëdambo iquec, quequin tantiamebanshun mimbi tantiaid icsa mibi bunaid icsabëdtabi ënta, quequin Nuquin Papan chiaidënquio mibi tantiamendac. ¹³Abitedi isquidquio Nuquin Papa nec. Adquid icquin matses ompodtiapimboenoc isendac. Adembidi, Ëmbi chiacpadomboenda matsesën nabanoshe. Tantianu, qeshun, abi yacno tabadnuequin cainquido bëisquioquin ambi nabanaidtedi chuimendac.

Matses chuibanec Nuquin Papabëd onquequid dapa Esuquidistu

¹⁴Adec Nuquin Papa abitedi isquidquio icnubi icsambocquid icquin ambembi matsesën aid chuitiapimbocsho isun abi tantiaquido chuibanec Nuquin Papabëd onquequid dapa ënden abi yacno dectatonëdaid Esuquidistu nec. Aidi Nuquin Papan Madombo nec, quequin tantiesa yanchitomane qeshun aidquio tantiaquionona. ¹⁵Matses chuibanec Nuquin Papabëd onquequid dapa matses yequi natiamiacmaidbimboec tsadpondash, quetiapimbo nuqui iquec.

Matsesacsho mayan icsan, Nuquin Papan chiaid niacmenu, cac niaquenquio Esuquidistun icpanëdash.

¹⁶Adquid nuqui chuibanec Nuquin Papabëd onquequid dapa iquec, quequin tantiec dacuëdenquio yec abi yacno ënden Esuquidistubëd puduedquidëmbimboen Nuquin Papa ëmbitsen chuinuna. Icsashun Nuquin Papa chiac, Con mado Esus mibi icsaid bedshunash abided cuidadpanëdash, quequin tantiec mibi icsaid bëpiscudobi, quequin mibi tantiamec. Adembidi mibi natiamiaid abi chuisho Nuquin Papan Mayanën mibi chieshmenquiocquin dayacquo icmendac.

5 ¹Ëndenquimbo Nuquin Papan, Min matses chuibanec ëbëd onquequid dapa icta, caid isadaidbo utsi-utsiec icpampic. Adquid Nuquin Papan icmiac, Con matses icsapash icnui, qeshun nidaidën capuquid yua cuesunedenequin taudenepampic. Adembidi, Mibi bëdambo iquec, Papa, quequin ismequin, Nëid menenu, cac Nuquin Papan naden nata cain chiacpadomboen naquin aton matsesën bëaïdo cuesuneshun taudenepampic. ²Aton matses chuibanec Nuquin Papabëd onquequid dapan aton matses icsasho isun, Con matsesbëdi icsaquid nebi, quequin ³nidaidën capuquid yua utsi-utsien cuesunedenepampic.

⁴Aidi, Con matses chuibanec Nuquin Papabëd onquequid dapa icnu, quenquio icpampic. Nuquin Papambi, Min matses chuibanec ëbëd onquequid dapa icta, caid nepampic. Min matses chuibanec ëbëd onquequid dapa icta, Nuquin Papan abia caid Adon cuëmëdquid icpampic. Aidi unësan abi tsibanquid-abi tsibanquidquien Nuquin Papan, Min matses chuibanec ëbëd onquequid dapa icta, caid icpampic.

⁵Adembidi Nuquin Papan, Matses

chuiбанec ëbëd onquequid dapa icta,
caid Esuquidistu iquec. Ëbibi adquid
icnu, quenquo Esuquidistu icpanëdash.
Aton Papambien:

“Mibi con Madombo neque.

Con shubun icquido mimbi icmiaido
chuiбанec ëbëd onquequid dapa
icta,”

capampic aton Papan Esuquidistu
chuiquin. Adembidi Esuquidistu
chuiquoquin aton Papanquid:

“Matsesash icsaisa yec min utsibo
icsaid bedshunash cuidadec
unësash uincuenash matses
chuiбанec ëbëd onquequid dapa
icta,”

capampic. ⁶Ambi chiaid utsi nad
icpampic:

“Matses chuiбанec ëbëd onquequid
dapa Medquisedec
yampidpadquid mibi nendac.
Adquid yec ënëdenquictequidquo
mibi nendac.”

⁷Adec, Con Pan chiampicpadquid
icnu, quiaish matsesacsho unës uaquin
mëyante nendabi, quequin tantiec
shubiec nadpanëdash. Matses icsaid
bedshunash cuidadquid ëbi icmenda,
quetiapimbo iquebi, Papa. Matses icsaid
bedshunash cuidadquid iquendabi.
Mimbi chiacpadomboen natiadquid
iquebi, Papa, quequin yuen
chuidonepanëdash Esuquidistun. Aden
abi chuisho aton Papan adquidquo
icmepanëdash. ⁸Nuquin Papan
Madombo iquequi matsesacsho
mëyanac Nuquin Papan
chiacpadomboen tantiabempanëdash.
⁹Aden tantiabenash matses icsaid
bedshunash abided cuidadash Nuquin
Papa yacno Yuedanquid
yanquiopanëdash. ¹⁰Adoacsho isun,
Nëbi matses chuiбанec ëbëd onquequid
dapa Medquisedecpadquid icta, cain
Nuquin Papan Esus chuipampic.

Nuquin Papan chiaid ënden tantiaboedi tantiesa yanenda

¹¹Ambia matses chuiбанec Nuquin
Papabëd onquequid dapa Medquisedec
nepampic. Aid chuiquin tantiamete
dadpen iquec. Aidtedi
chuitiadquicquin mibi eme uacsho
ÿmitsipadomboentsimbi chuiбанquin
mibi tantiamete? ¹²Mibia utsin
tantiamiaid icquin ënden
tantiabempatecnëdan mibitedishun.
Adembidi mimbi abia tantiad utsibo
tantiamepatecnëdan. Bacuën shuma
chishquin tantiacpaden tantiaquid
icquin Nuquin Papan chiaid
tantiatiapimbo mimbi icpec. ¹³Shuma
chishquid bacuëmpi, Bëdamboen nata,
quequin chiaid tantiesa nec. ¹⁴Pete
pequidëmbien, Nadomboen nata,
quequin ismiac adomboembidi isbanec
mëquiadquidën icsa uainquicquin
nabanec. Adomboembidi Nuquin Papan
chiaid tantiamic tantiabenquidquo
yanshun adomboen nabandenec.
Adquid yanshun utsin, Naden nata,
caqui, Aden naic Nuquin Papapadquid
yampebi, quequin nabanquid. Utsin,
Naden nata, caqui, Aden naic icsatsiabi,
queshun nainquo iquendac.

6 ¹Aden Esus chuiquin abia
tantiamiaid bëdamboen tantiashun
abipadquid icnuequin abi chuiquin
tantiamiaid utsi tantiaquionona. Abia
tantiamiaid nad iqueque. Tania.
Chuinu. Esus tantiaquid icta. Adquid
icquin icsaid ënta. Adembidi, Nuquin
Papan chiaid tantiaquidquo icta.
²Adembidi, Esus tantiaquin acten
mentometa. Adembidi, Nuquin Papan
abi tantiaquid aton Mayan
menenuequin mëdanten mamishaid icta.
Adembidi, Abi tantiaquid unësash
uincuenta iquec, quequin
tantiaquidquo icta. Adembidi, Abi

tantiesa cuidtequid iquendac, quequin tantiec bēdamboec tabadteneta.

³Aidtedi mimbi tantioc. Aidtedi tantiaquioshon, Adembidi ambi tantiamiaid utsitedi tantianuna, quequin tantiaquin nabanta. ⁴Aden Esuquidistu tantiasho isun aton Mayan Nuquin Papan meniaid icboedi ⁵Nuquin Papan chiacpadomboen nadatiambocquin nabamboed, ⁶Esus matesquio yec icsamboquid nepanēdash, quiash, Esus cuستن dectan, quequidbimboecquid icsho Nuquin Papan aid isendac. Aidēn oncain Esus mamēnshunec. Aden Esus tantienquio yanacsho bēdamboen tantiamenuen chuiquin, Icsaobique. Ēbi icsaid ēnu, cametiapimbo Nuquin Papan iquendac.

⁷Baded-badedquiec ue sequequin nidaid pachi uaidēn tiedēn caniquid caniacsho taneshcaquidēn petequid nendac. Adecbidi Esuquidistu chuiabanac abi tantiaquiosho Icbon yuedaido iquendac. ⁸Echobēd cana shēta chedo ēshē idash dadpen yanushe qeshun nēdēncatequid nendac. Adecbidi icsamboen chiaid tantiaquid uquē nēsiatequid nendac.

⁹Aden mibi chuiquimbi, Nuquin Papan nēsiatemaide mibi nec, quequin tantiembi. Esuquidistu tantiaquid yec abi tantiaquid utsibobēd tantiananec bēdamboec tabadquin ismequid nec, quequin mibi chuiquin utsibon chioishi. ¹⁰Adoac abi tantiaquid utsibo tantiaquin mimbi nashundeniaid Nuquin Papan bēpiscudenquiocquin tantiec.

¹¹Adecbidi utsibobēd tantiananec mibi bēdamboec tabadpashun. Adece tabadash abi yacno puduedsho, Bēdamboen mimbi nabanoc, Nuquin Papan mibi caindac. ¹²Aden nabanec chieshenquiocquin Nuquin Papan chiaid tantiaquioquin tsusedpabomba caimbudec unēsash Nuquin Papa yacno

puduedampicpadec Esuquidistu tantiaquioquin ēnenquiocquin caimbudequi ma Nuquin Papa yacno puduedpanuna.

Naden nanu quec Nuquin Papa muatiapimbo iquec

¹³Ēndenquimboshē Abadauan bēdamboec tabadsho isun ambia tantiaquidquio abi yampidquibidi icquin, Ēmbibi tantiacpadomboen nanuna. Abimbo caimbi, quequin Nuquin Papan naden chuiampic: ¹⁴“Mimbi tishmiaidēn tsyuecquido dadpen iquendac, qeshun ēmbi chiacpadomboen nabanquin mibi, Bēdambo iquebi, camembi,” quequin Nuquin Papan Abadauan chuiampic. ¹⁵Aden chuisho tantiashun caimbudquin tishtiapimbocquidēmbi Abadauanēn chidon aton mado tishpampic.

¹⁶Abimbo caimbi, quequin abitedi tantiaquidēnquio Nuquin Papan chiac utsi, Muenec, quetiapimbo iquendac. ¹⁷Adembidi, Ēbi yacno tabadte iquendac, quequin ēnden yampidēn Nuquin Papan chiaid chuca uatiapimbo iquebi, quequin Esuquidistu tantiaquido tantiamenuen abimbo caimbi, quequin chuiapanēdash. ¹⁸Adec Nuquin Papa muatiapimbo icquin ambi chiacpadomboen naquidquio Nuquin Papa nec. Adembidi, Ēbi yacno tabadte iquec, quequin chiaid chuca uatiapimbo iquec. Adquid Nuquin Papa icnuc abi yacno ēbi puduedmequid Esus iquec, quequin caimbudquid nuqui nendac.

¹⁹Aden caimbudquin, Ēnden Nuquin Papa yacno puduedshun ēbi yuedquid iquec, quequin nuqui tantiec. ²⁰Nuqui caintequid Esuquidistu ēnden Nuquin Papa yacno bēyucanec abi tantiaquido chuiabanec Nuquin Papabēd onquenuec puduedash Medquisedecpadquid yampanēdash.

**Medquisedec matses chuibanec Nuquin
Papabéd onquequid daba**

7 ¹Medquisedec nad icpampic, Saden yacnocquido chuiquid daba nepampic. Ambi Saden cain cuënaidi yuecshun Edusaden cain cuënoapampic. Aidbidi Nuquin Papan, Matses chuibanec ëbéd onquequid daba icta, caid nepampic. Adquid icquin aton mado bedboedo tsibanshun cuesuniash Abadauan chosho bëquedshun, Nuquin Papan bédamboen isaidquio mibi nec, quequin Medquisedequën Abadauan chuipampic. ²Adsho tantiash, Nuquin Papan con mado bedmiaid nebi, quequin ambi cuesuneboedën na ambi bedboed musuctanquin abi chuibanec Nuquin Papa chiec onquequid daba Medquisedec Abadauanën menepampic. Bédamboen tabadmequid icsho Medquisedec cuëmpampic. Adembidi, Saden yacnocquido chuiquid daba icquin bédamboen tabadmequid icsho Medquisedec cuëmpampic. ³Aidi aton papabéd aton tita nibédquid nec. Nèid ushën tishaid nebi, quetiapimbo aid iquec. Abi unëste ushë adquiobidi iquec. Nuquin Papan Madombo aben icquidpadquid Medquisedec nec. Matses chuibanec Nuquin Papabéd onquequid daba yanash adquiduidquio iquec. Utsi yantiapimbo iquec.

⁴Aidi ëbi chuibanec Nuquin Papabéd onquequid daba nec, quequin ismequin ambi bedaïd aton na musuctanquin Abadauanën Medquisedec menepampic. ⁵Yuecquiocshon Nuquin Papan: Min matses chuibanec ëbéd onquequid daba icta, caid mibi icquin min utsibon aton na musucaïd bedshunta, quequin Debi chuipampic. Adoac adquid Debi icash unësan aton tsyuecquid abentse-abentsec icpampic. Debi Abadauanën tsyuecquid yec aton

utsibonquio aton na musucaïd bedquid icpampic. ⁶Medquisedequëmbien tsyuecquidpenquio icquimbi Debin tsusedpa Abadauanën na musucaïd bedshun, Nuquin Papan bédamboen isaidquio mibi nec, quequin Abadauan chuipampic. ⁷Bédambo mibi icmenu, quequin Nuquin Papan chiaïd ambia chuiquid Medquisedec icpampic.

⁸Yuecshun ambia chuibanec Nuquin Papabéd onquequid dapapadquiocquin aton matsesën na musucaïd bedquid Debi unëspampic. Adecbidi aton tsyuecquido unëspampic. Padnuen Abadauanën na musucaïd bedquid Medquisedec unësesa yampampic. ⁹Adquid icsho Debin buchisio Abadauan caïdën, Con tsyuecquid dadpen iquendac, quequin tantiaquin, Con na musucshun menenu, qeshun Medquisedec menepampic. ¹⁰Aton tsyuecquid tishambocnobi Debin buchisio Abadauan caïdën Medquisedec bëquedtuidshun menepampic.

Medquisedec yampidpadquid Esuquidistu

¹¹Abadauanën tsyuecquido Debipadquidon Nuquin Papan nadomboen nata quequin chiaïd nadenequin aton matses bédambocquid icmian Medquisedecpadquid choenquio ictsempampic. ¹²Debipadquidon aden nadeneshun aton matses icsaisa icmetiapimbo ican Medquisedecpadquid matses chuibanec Nuquin Papabéd onquequid daba yampanëdash. Debipadquidën Nuquin Papan nadomboen nata cain ëndenquimbo chiaïd nadenepampic. Nëbi Nuquin Papan chiaïd utsi naquid Medquisedecpadquid Esuquidistu nec. ¹³Aidpadquid icquin Nuquin Papa nidaidën tabadte shubu uashunaidën puduedshun nambocpanëdash. ¹⁴Aton tita Uda cuëmëdquidën tsyuecquid

icnuc matsesash Udan tsyuecquid
Nuquin Icbo Esuquidistu nec. Adquid
icquin Debipadquidën
nadeniampicpaden natiapimbo
Esuquidistu icpanëdash. Adembidi ambi
tantiaiduidi chiec Moises, Udan
tsyuecquid Debipadquid nec, quenquo
icpampic. ¹⁵Medquisedecpadquid
matses chuibanec Nuquin Papabëd
onquequid dapa Esuquidistu yanan
nadomboen nata quequin chiaid utsi
iquendac, quequin nuqui tantiec. ¹⁶Aton
matses chuibanec Nuquin Papabëd
onquequid Debi unësan Debin
tsyuecquid aton matses chuibanec
Nuquin Papabëd onquequid icpampic.
Adquidpenquo Esuquidistu
yampanëdash. Matsesash icsaisa yec
unëdash uincuempañëdash. Adec
uincuenquid yec unëtiapimbo iquec
matses chuibanec Nuquin Papabëd
onquequid dapa yanquiopanëdash.
¹⁷Aid chuiquin Nuquin Papan
nadopampic:

“Ènenquiocquin matses chuibanec
Nuquin Papabëd onquequid dapa
Medquisedecpadquid mibi nendac,”
quequin chuiampic.

¹⁸Aden chiambien matses chuibanec
Nuquin Papabëd onquequid dapa
Debipadquidon Nuquin Papa nidaidën
tabadte shubu uashunaidën puduedshun
ënden nadomboen nata cain
chiacpadomboen nadenequin aton
matses icsaisa icmetiapimbo icpampic.
¹⁹Adoaid Nuquin Papa yacno
puduedtemaid matses icpampic. Nëbien
bëyucanec puduedash Nuquin Papa
yacno abi tantiaquido chuibanec
Nuquin Papabëd onquec tabadec,
quequin abi yacno yuedte caimbudec
nidaidën Nuquin Papabëd
tabadac bimboec nuqui tabadec.

²⁰Abimbo caimbi. ¿Matses chuibanec
Nuquin Papabëd onquenu quec

puduedquid ënëdenquiocnoc mibi
icmendambi, Mado, quenquioda Nuquin
Papa icpampic? Ai, aden chuiampic.
Aden Debi chienquiocquin aton
madouidtsëqui chuiampic. Debi
unësan aton tsyuecquid aton matses
chuibanec Nuquin Papabëd onquequid
dapa icpampic. ²¹Nëbi Nuquin Papan
aton Madombo caic:

“Icbo icquin matses chuibanec ëbi
chiec puduedoata, mado, quequin
abimbo chiembi.

Aden chuiquin chuca uainquo
iquembi.

Èndenquo yampid yec ëbi yacno
utsi puduedmenush ëbi chiec
puduedash ënëdenquo yec
tabadquid mibi nec, quequin
abimbo chiembi,”

quequin chiampicpadec aton Madombo
adquid yanquiopanëdash. ²²Adquid yec
matses icsaid bedshunash abided
cuidadash abi tantiaquido yuedec
bëyucanquid Esuquidistu nec. Debibëd
aton tsyuecquid adecbidi adquid
ictiapimbo iquec.

²³Debi adecbidi aton tsyuecquido
unëstequidquido iquec yuen chuibanec
Nuquin Papabëd onquequid dapa
ictiapimbo iquec. ²⁴Esusien abi yacno
chuibanec bëyucanec puduedash
ënëdenquo yec Nuquin Papabëd
onquequid dapa nendac. Adquid utsi
nibëdendac. ²⁵Adec Nuquin Papa yacno
ënëdenquo yec tabadquin abi
tantiaquido chuibanec aton Papabëd
onquedenenuc abi tantiaquido Nuquin
Papa yacno ambi yuedtequid iquec
abipadquid icsaisa yec tabadendac.

²⁶Adec aidi abi yacno yuedanquid,
icsa nibëdquid, icsa uatiapimbocquid,
icsa nibëdquiec yacno tabadquid yec abi
tantiaquido chuibanec Nuquin Papabëd
onquequid dapa yampanëdash.

²⁷Debipadquidpenquo yec, Matses

icsaquid neque. Nuquin Papan chiampicpaden baded-badedquien nidaidën capuquid yua cuesunenu, quenquio icpanëdash Esuquidistu. Matses icsaid bedshunash abided unësapanëdash padpidec unësenquio icnush. ²⁸Debibëdi abipadquid icsaquid icsho, Min matses chuibanec Nuquin Papabëd onquequid dapa aid icmeta, Nuquin Papan cac Moisesën Debi adquid icmepampic. Nëbi Medquisedecpadquidien Bëdambocquid icpampid ëbëd onquec ëbi yacno Puduedquid Abentsëcquiobi mibi iquendac. Abimbo caimbi, quequin Nuquin Papan chiampidquio Esuquidistu nendac.

Matses chuibanec Nuquin Papabëd onquec abi yacno puduedquid

8 ^{1,2}Adec Esuquidistu abi tantiaquido chuibanec Nuquin Papabëd onquequid dapa Nuquin Papa tabadacnombobi puduedoash aton Papa Abiambo Yampidbëdquio onquec tabadec. Debipadquidoen aton matses chuibanec nidaidëshun Nuquin Papa tabadte shubu uashunaidën puduedash auëshquio Nuquin Papabëd onquepanëdash.

³Con matsesbëdi icsaposh icmanendac, queshun aid shubun puduednu queshun umanucshun nidaidën capuquid yua aidon cuesunepampic. Adembidi Nuquin Papa tantiaquin menuequin aton matsesën bë-bëaid bedshun nadenepampic. Esusien Nuquin Papa yacno puduedoanush, Ëbi icsaid ëbibi ciudadnu, quenquio yec matses icsaid bedshunash abided cuidadpanëdash.

⁴Aidi unësabi yec nidaidën tabadnuc Moisesën chiacpadec Debipadquid matses chuibanec Nuquin Papa chiec onquequid icpanëdash. Adquid icnuc nidaidënuësh matses chuibanec Nuquin

Papabëd onquequid dapa ictiapimbo Esuquidistu icpanëdash. ⁵Nidaidën tabadquin Nuquin Papa tabadte shubu uashunaidën puduedshun Debipadquidën nashumpampic. Ëndenquimbo Nuquin Papan shubu naden icchitec, quequin abi tabadte shubu uanu, quesho tantiaquid: “Macuësh yacnoshon chuibocpadomboen shubu uame,” Nuquin Papan cac Moisesën chuioapampic. Aden chiac Nuquin Papa tabadte shubu uashumpampic. ⁶Adnubien yuecash Nuquin Papa tabadacnombo aton Madombo abi tantiaquido chuibanec Nuquin Papabëd onquec puduedpanëdash. Aidi abi tantiaquido yuedquid nec. Aid ambo puduedabicnuc ambi naden nata cain chiaid Nuquin Papan Moises meniampicpadomboen naquin aton matses chuibanec Debipadquid Nuquin Papabëd onquec abi yacnombo yuedanquid ictiapimbo icpampic. Esuquidistuen Nuquin Papabëd abia yampid bëyucanec abi yacnombo nidoash abi tantiaquido chuibanec Nuquin Papabëd onquequid yec yuedanquidquio nec.

⁷Ëndenquimbo nadomboen nata cain chiacpadomboen nadenequi matses icsaisa yanuc naden nata cain chiaid utsi Nuquin Papan chienquio ictsempañëdash. ⁸Nadomboen nata caqui ambi chiacpadomboen nadenequi matses icsaisa yantiapimbo icsho isash:

“Yuecash ëmbi chiaid utsi iquendac. Aid isadaidbo chiendambi. Aidbidi Udan tsyuecquido chiendambi.

⁹Aidën tsusedpabo Equipito yacnoshon bëyucamequin ëmbi chiacpadpenquiocnoc chiaid utsi iquendac. Ëmbi abia naden nata cain chiaid Isadaidbon chieshënsho

utsibon natiacquin mëyansho isun
isadaidbo
mënchicamboccondambi.

¹⁰ Ēnden chiaid adquo icnuc:

Nëbi ëbëd tabadmetequid chiaid
nendac, quequin isadaidbo
chiembi.

Ēmbi nadomboen nata cain chiaid
isadaidbo pausunendambi
tantiata bunquionoc.

Aden tantiamia sh aton Papa
iquendabi.

Adecbidi adquidquo con matses
iquendac.

¹¹ Adoaid Nuquin Papa tantiaquid icta,
quesa iquendac.

Abitedi ëbi tantiaquidquo
iquendac.

Nëidtedishun ëbi tantiendac:

Nëidic, bacuëbo; nëidic, caniabó;
nëidic, tsusiobo aitedeshun.

¹² Aido icsaiddedi padpiden

tantienquo yec bëpiscudendabi,”
quequin Nuquin Papan chiaid utsi
nendac. ¹³Chiaid utsi nec, quequin
ënden abia nadomboen nata cain chiaid
ënëdendac.

Nuquin Papa tabadte shubu uashunaidën puduedshun naid

9 ¹Nuquin Papan ambi, Ēbi ismequin
nadomboen nata cain chiaid
dadpen dada uameshun isadaidbo
menepampic. Nuquin Papan naden ëbi
tabadte shubu uashun cacpadomboen
abi nidaidën tabadte shubu
uashumpampic. ²Nuquin Papa tabadte
shubu uashunaid nitsinaid anquënë uaid
daëd icpampic. Baded-badedquiec
puduedte anquënë uaidën tabote
dectantebëd pan sante cueste nacnenaid
icpampic. Icsaisa anquënë uaid nec caid
niosh. ³Aid nuntambidi
bitsipambocquid daëdcashun
dectanëdaid shëcuë anquënë uaid dayun

uequid Isaisa Bëdaidquo cain
chianiaidquo niosh. ⁴Aid nuntan
bëdambo noadquid sandoshon tauite
shocosh icpampic. Ambobidi cueste
dabitacaid shocosh icpampic. Aid
cuesten sauedaid mana caid isadaidbon
piampid dayun uaid icpampic. Aid
sauedaid utsi Adonën cueste tiaid
dëyucaid icoapampic. Aid sauedaid utsi
cuënote pada uashun Nuquin Papan
nadomboen nata quequin dada uaid
icpampic. ⁵Aid sauedte matincash
tabadquid ambi abi yacnoshon uaid
mayan bëdambocquidbimboecnuc
nacnenaid daëd icpampic. Aid daëd
Nuquin Papa icsaisambo
bëchomauanquiec nac-nacquio
ismiantequid icpampic. Nidaidën
capuquid cuesuniaidën intac daseccaid
isun Nuquin Papan matses
cuidenquioctsiash, quequin aidën podon
dëcatequin dectanaid diadpampic. Aid
Icsaisa Bëdaidquo anquënë uaid
sanaidtedi chiombi.

⁶Aden shubu uashun aidën icquiddedi
nambanash icsaisa anquënë uaidën
baded-badedquiec puduedquidon
Nuquin Papan Moises chiacpadomboen
uesquin nabampampic. ⁷Padnuen Isaisa
Bëdaidquo anquënë uaidën
setan-setanquiec matses chuibanec
Nuquin Papabëd onquequid dapa
puduedpampic. Baded-badedquiec
puduedtemaid aid nec. Ēmbi con
matsesbëdtan Nuquin Papan chiaid
niacposh icmanendac, quequin nidaidën
capuquid yua cuesuneshun intac
bedshun buanec nuntan bitsipambocnoc
daëdcashun dectanëdaid shëcuë
anquënë uaid dayun uequid Icsaisa
Bëdaidquo caidën puduedquid
abentsëqui nepanëdash. Unësaidën intac
buanenquo yec puduedtemaid aid
anquënë uaid nec. ⁸Adec aid anquënë
uaidën puduedquid isadaidbo

abentsëqui icnubi Nuquin Papa yacno aton matses puduedte nibëdec, quequin Nuquin Papan Mayanën tantiamete nendac. ⁹Adembidi, baded-badedquien nidaidën capuquid yua cuesunedenec, Ëbibi bëdambocquid nec, quetiapimbo icpampic. Adembidi aton matses icsaisa icmetiapimbo icoapampic. ¹⁰Adecbidi, Nëidic petequid nec. Nëidic actequid nec. Nëid nanush mëpamëdtequid nec, quequin chiacpadomboen nabanquin icsaisa icmetemaibidi nendac. quequin Nuquin Papan Mayanën nuqui tantiamec.

Esuquidistu abided unësec intac chiuidaid

¹¹Ambi chiaid utsi tantiamenuec ambi uacmaid yec abipadquid Esuquidistu Nuquin Papabëd tabadboedi nidaidën budash matsesash icsaisa yec matses icsaid bedshunash abided cuidadec unësash Nuquin Papa yacno matses chuibanec aton Papabëd onquequin chuiquid dapa iquec abi yacno Yuedanquid yampanëdash. ¹²Nidaidën capuquid yua cuesuneshun intac bedshun buanec Nuquin Papa yacno puduedenquio Esuquidistu icpanëdash. Aidi abia yampidi icsaisa matses icsaid bedshunash abided cuidadec unësacsho cudan siac aton intac chiuidash Nuquin Papa yacnombo puduedoapanëdash. ¹³Aidi matses icsaid bedshunash abided cuidadabicnuc nidaidënshun natemaid nasho matses cuëshëdmepanëdash. Adoac utsibëd ictiapimbocsho isun nidaidën capuquid yua cuesuneshun aidën intacbëdta sisapuc daëd uashun daseccac icsaisa icmiabi yequi aton shubun puduedoapanëdash. ¹⁴Abia abëd yampid unësasa aton Mayambëd iquec Esuquidistu icsaisambo yec, Matses icsaid bedshunash ëbided cuidadebi, Papa, quianec unësacsho siac aton intac chiuidacsho isun uincuemiaidën nuqui

pauquec ma Nuquin Papan chiacpadomboen nate bunquidquio nuqui icpanueshun. ¹⁵Adoaidi Nuquin Papan chiaid utsi chuiquin tantiamequid Esuquidistu icpanëdash. Ënden matses yampid icsaidbëdtabi nëbi matses icsaid bedshunash abided cuidadec unëspanëdash ëbi tantiaquido ëbëdi tabadmenu quiaish.

¹⁶Adnubien abi unëste tantiec, Ëbi unësan ëmbi chiacpadomboen con na abitedi menebanta, matses quepec. Aden chuiquid unëso isun ambi chiacpadomboen menebanec. ¹⁷Aden chuiquid unësabi icnuc ambi chiacpadomboen utsibon metetiapimbo iquec. Icbon na abi iquec. Aid unësan aidën na icboedi utsin na yanec.

¹⁸Adembidi ambi nadomboen nata cain chiaid Moises menequin, Ëmbi chiaidtedi nadenesho isun ëmbi chiacnombo mibi buanembi, quequin Nuquin Papan chuiampic. Aden menequin chiac Moisesën nadopampic. ¹⁹Nuquin Papan chuibocpaden chuishun nidaidën capuquid yua cuesuneshun intac bedshun actebëdta daëd uain cacushun cuëte shubi madquënaid podo mësequiabicquid bedshun sedquid piu uaid potaneshun daëd uaboed nënanshun Nuquin Papan chiaid dada uaidbëdta matses daseccabampampic: ²⁰“Nëid Nuquin Papan chuibocpaden mimbi natequidquio nec,” quequin ismequin Moisesëmba abitedi daseccabampampic.

²¹Adoshombic Nuquin Papa tabadte shubu uashunaibëdta aidën tabëcaidtedi daseccabampampic. ²²Cuesuniaidën intac daseccatequid nec. Shubu chedo cuesuniaidën intaquën daseccabicquid mishtemaid nec. Adecbidi cuesuniaidën intac chiuidenquiocnoc matses icsaid Nuquin Papa bëpiscudenquio iquendac.

²³Nuquin Papa yacnombo puduednush icsaisa unësendac, quequin

ismenuen matses chuibanec Nuquin Papabéd onquec nidaidén capuquid yua cuesuneshun intac bedshun buanec Nuquin Papa nidaidén tabadte shubu uashunaidén puduedpampic.

²⁴Esuquidistu matses icsaid bedshunash abided ciudadec unēsash nidaidēnshun Nuquin Papa tabadtebimboecnuc shubu uashunaid yacno puduedenquio icpanēdash. Abi tabadacnombo abi tantiaquido chuibanec aton Papabéd onquec puduedash abi tabadec. ²⁵Ambo puduedash, Matses icsaid bedshunash ēbided padpidec ciudadnu, quenquio yec tabadec. Nidaidēnshun setan-setanquien Nuquin Papa tabadte shubu uashunaidén puduedquin aton intacpenquio bedshun daseccadenec.

²⁶Matses icsaid bedshunash abided ciudadec unēsambo yec Nuquin Papa yacno puduedoash padpidec nidaid yacno choash unēsash abuc Esuquidistu puduedoatsiandac. Adenquio iquec matsesash abi unēste ushēnquiobi matses icsaid bedshunash abided ciudadpanēdash nēid nidaid naimēdbudte anoentsēqui icnuc.

²⁷Nidaidén icquid unēste ushē abentsēc iquec. Unēsacsho ambi naid Nuquin Papan chuitequid ushē choendac.

²⁸Adecbidi matses icsaid bedshunash abided ciudadec Esus unēste ushē abentsēc icpanēdash. Matses icsaid bedshunash cuidadoanu, quenquio yec aidquio padpidemboec choendac. Abi cainquido abi yacno puduedmenuec choaindac.

Abided ciudadec unēste abentsēquēnquiobi

10 ¹Setan-setanquien nidaidén capuquid yua cuesuneshun intac bedshun buanec puduedsho isun matses icsaid bedshunash abided unēsash abi tantiaquido chuinuc bëyucanec Nuquin

Papa yacnoēsh yuedanquidquio choec, quequin nuquin tsusedpabon tantiabempampic. Nidaidén capuquid yua cuesuneshun intac buanquid aton matses icsaisa icmetiapimbo yec Nuquin Papa yacnombo abéd onquetiapimbo icpanēdash. ²Aidēnquio daseccaquin matses icsaisa icmiac nidaidén capuquid yua padpiden cuesunenquio ictsempampic. Adecbidi, Icsambocquid nebi, quenquio matses ictsiandac. ³Aton matses isaisa icmetiapimbocquin setan-setanquien nidaidén capuquid yuaded cuesunepanēdash. ⁴Adshun yuan intac bedshun daseccaidén matses icsaisa icmetiapimbo iquec.

⁵Adoquien Esuquidistu nidaidēnshun tishac caniaash onquec:

“Nidaidén capuquid yua cuesunenubi ėmbi chiacpadomboen matsesēn natiapimbo iquec queshun yua cuesunete bunenquio mibi iquec, Papa.

Matsesēn tishtequid mimbi icmiaidquio nebi, Papa.

⁶Adecbidi nidaidén capuquid abichobi tauideniac matses abi icsambo iquec, quiash, Padi. Adoenda, mibi quec, Papa.

⁷Adsho isun mimbi chuiquin dada uamiampicpadomboen naimbi, Papa.”

⁸Mimbi dada uamiampicpadomboen matses chuiquidén nabanquimbi aton matsesbéd bēdamboec tabadenquiocsho isash, Padi. Aid nainquiocquin ėnta, quequin mimbi matses chuinuc ⁹mimbi ėnden nadomboen nata cain chiaid naimbi, Papa, quiash matses icsaid bedshunash abided ciudadec unēsun Nuquin Papan ėnden chiaid ėmepanēdash. Aden ėmian nēbi Nuquin Papan chiaid utsi iquec. ¹⁰Aden Nuquin Papa bunacpadomboen nash

unëstiapimbo yanshun abi unëste
ushënquo abi tantiaquid paucpanëdash.

¹¹Aden matses icsaid paucpec,
quetiapimbocnoc
badiadquiën-badiadquidënquien
nidaidën capuquid yua cuesuneshun
intac bedshun daseccaquin icbo
icsaidbëdta utsibo icsaid pauctiapimbo
iquendac. ¹²Esuquidistuen abided
unësash abi tantiaquido icsaid
pauctequid abentsëquiobi iquec aton
Papabëdi ënëdtiapimbo yec abitedishun
icbombo iquec. ¹³Ambobi tabadquimbi
abi chieshënquido ambi
chiacpadomboen naquidquo icmete
ushë cainec. ¹⁴Abided unëste ushënquo
abi tantiaquid ambi icsaisa icmiaid abëd
cuëshëdesambo yampanëdash.

¹⁵Adembidi Nuquin Papan Mayanën
Nuquin Papan chiaid utsi naden chiec:

¹⁶“Nëbi ëbëd tabadmenun chiaid utsi
nendac, quequin chiendambi.

Aidi aton pabiaten
puduedmendambi
paucudenquionoc.

Adembidi ëmbi chiacpadomboen
nate bunquidquo icmendambi,
quec Ico.”

¹⁷Adshumbic Nuquin Papan chiaid utsi
abi chiec aton Mayan:

“Abi icsaidtedi padpiden tantianu
quenquo yec bëpiscudendabi,
queoaic Ico,”

quequin chuipanëdash aton Mayanën.

¹⁸Adec abi icsaid bëpiscudash nidaidën
capuquid yua cuesuneta quenquo
Nuquin Papa iquec.

Nuquin Papa yacno puduedte cainta

¹⁹Adoaidi Esuquidistu unësacsho isun
cudan siac aton intac chiuidan, Ambi
paucaid nebi, quec dacuëdenquo yec
Nuquin Papan shubu icsaisa caid
yacnombo puduedte ushë nuqui
cainendac. ²⁰Matsesash abided cuidadec

unësash Nuquin Papa yacno
puduedoash tabadquid Esuquidistu nec.

²¹Ambo nidash Nuquin Papabëd
onquequin aton shubun icquido nuqui
Esuquidistun chuibanubi, ²²Ambi
paucaid ambi dapanacbimboecquidbidi
nebi, quequin tantiaquin abi yacno
choacbimboen nidaidëshun Nuquin
Papa chiec onquec tabadnuna. ²³Nuquin
Papa ambi chiacpadomboen naquidquo
nec, quequin abi tantiaquid yec abi
yacno puduedebi, quequin
caimbudnuna. ²⁴Aden tantiaquin abi
tantiaquid utsibobëd tantiananec
bëdamboec tabadquin nashununa.
²⁵Aden nabanec abi tantiaquid
utsibobëd iccuededtiapimbo iquebi,
utsi-utsiec quiacpadec adenquo icnuna.
Adec iccuededec, Nuquin Papan
chiacpadquiec bëdamboec tabadnuna,
quec chuinanta. Niacquid dadpen icsho
isash, Matsesën naid chuibanquin cuidte
ushë badedquo choec, quiash
baded-badedquiec chuinanta
bëdamboec tabadte bunec.

²⁶Ëbi icsaid bedshunash abided
cuidadec Esuquidistu unëspanëdash,
quequin tantiash icsaded-icsadedquid
iquec, Adquidquo Esus nec,
quetiapimbo iquec. ²⁷Aid cuidte ushë
chonoc nëishun comapenen
chushcaindac Nuquin Papan abi
chieshënquido nibëdamequin.

²⁸Nadomboen nata cain Moisesën chiaid
niacsho isun daëdshun chiac niacquid
unësmiampic. ²⁹Nuquin Papan abia
naden nata cain chiaid niactenequid
adomboen cuidnushe quiash ëbi icsaid
bedshunash abided cuidadec
Esuquidistu unëspanëdash, queboedi,
Ëmbi tantiaboed Nuquin Papan
Madopenquo matsesquo ëbipadquid
icsacsho cuesuniac, quequin
chieshënsho ÷comapenen Nuquin Papan
cuidenquioda icpadic? Adquid Nuquin

Papan Mayanën bédambocquid icmenu quequin chiaid chieshénquid nec.

³⁰Nuquin Papan: “Èmbimbo èmbi chiaid chieshénquid cuidendambi,” quequin chiaid nec, quequin nuqui tantiec.

Adembidi: “Abi tantiaquid icboedèmbi tantienquio yansho cuidquidquio Nuquin Icbo iquendac. ³¹Abi cuidantequid dacuèdampambo iquec,” quequin Nuquin Papan chiaid nec.

³²Esuquidistu tantiaquid yanash mibi bédamboec tabadondacpaden tantiamec chuinandereta. Esuquidistu tantiabenacchuca icsho chieshëménquidon mëyanaqui, Esuquidistu tantiaquid nebi, quec dayacquio yec bédamboec mibi tabadteniondac. ³³Dadpen tabadnubi, èmbi tantiaid Esus nec, qesho mibi utsibon mamëshunondash. Adembidi aidon natiambocquin mëyanac. Adomboembidi Esuquidistu tantiaquid utsi mëyansho isun, Aidbèd icquid nebi, quequin ismequin mimbi nashundenepondac. ³⁴Esuquidistu tantiaquid utsi quënën nauedaic icsho isash abèdi tabadacbmboec natiambanquieq unësquio yec mibi tabadpondac. Adecbidi mibi chieshénquidèn mitsana bedacsho isash Nuquin Papan èbi menetequid ampetiapimbo iquec, quequin tantiec, Bédambo iquebi, quec mibi tabadpondac.

³⁵Adoaidi Nuquin Papan bacuè yec bédambo iquebi, quiash dacuèdenquio yec bédamboen nabanec mibi ènden dayacquio iccondacpadquieq adquiecbidi tabadteneta. Adquid Nuquin Papa yacno puduedquid nendac. ³⁶Utsin mëyanaqui Nuquin Papan chiaid chieshenquiocquin tantiadeneta. Adec tabadquin Nuquin Papa bunacpadomboen nabanash abi yacno tabadendac. ³⁷Nuquin Papan chiaid nadquio iquec:

“Chiata. Nèbien mimbi cainaid mibi mënchictequid choendac.

³⁸Adsho tantiec ambi pauctequid abi cainec tabadec nec.

Abi cainuidquido ambi puduedmetemaid nec.

Adquid, Cho, catiapimbo iquebi,” quec Nuquin Papa. ³⁹Aid cainuidash utsi tabadnubi abi choate nuqui cainec. Abi cainesa abi yacno puduedmenquiocquin Nuquin Papan chian anèdënquequid nésiatequid nendac. Nuquien abi cainquid yec Nuquin Papa yacno puduedtequid nec.

Nad iquendac, quequin tantiaquin cainquid

11 ¹Esuquidistu tantiaquidtedi con shubun icquido nec, quequin Nuquin Papan chiaid tantiaquin abi yacno tabadendabi, quequin abèd icte ushè nuqui cainendac. Aden cainquin, Con icbo èmbi isacmaid nec, quequin aid isbenacbmboen èmbi tantiaid nec, quec tabadquidquio nebi. ²Adembidi tantiec tsusedpabo tabadsho isun, Bédamboen mimbi tantiec, capampic Nuquin Papan aido chuiquin.

³Adembidi Nuquin Papan: “Abubèdi nidaid yanquiota,” cashumbic: “Aidënquiocquidtedi yanquiota,” cac ambi tantiacpadquiequi yampampic, quequin nuqui tantiec. Aden tantiec èmbi nèbi isaidtedi nibèdnuc Ìmitsipadomboentsi aidtedi icmebampampiba? quenquio nuqui iquec. Nuquin Papan: “Yanquiota,” quequin tantiacpadquiequi abitedimbo yampampic.

⁴Adembidi, Mibi tantiaquin mibi bunacpadomboen nidaidèn capuquid con yua cuesuneshun tauinu, quequin chuishun Abedèn naid Nuquin Papan bédamboen isaidquio icpampic. Aton utsin Cain caidèn aden tantienquiocsho

Nuquin Papan icsamboen isaid icpampic. Adosho isun Cainën aton utsimbo cuesuniambien Abedën Nuquin Papa tantiaquin naid chianetequidquo abi iquec.

⁵Adnubien adecbidi abi tantiaquidquo Enoc icsho isun Nuquin Papan buanac unësesa icpampic. Bëdamboquid nec, quequin Nuquin Papan buanacsho nibënquin Enoc istuidambocpampic. ⁶Abi tantiesa icsho isashien, Ëmbi bëdamboen isaidquo nec, quetiapimbo Nuquin Papa iquec, quequin tantiaish aid tantiaquid icsho, Abi yacno puduemetequid nebi, quequin tantiaquid ambi bëdamboen isaidquo nec.

⁷Adnubien adembidi Nuquin Papa tantiaquin Noe caidën, Nuquin Papan chiacpadomboen nanuna, queshun, Ëbëd icquid unës uanushe queshun, Con utsibo Nuquin Papan chiaid tantiesa yec unëstequid iquendac, quequin tantiaquin Noen cano dapa nacnempampic. Abi tantiaquin aden nasho Nuquin Papan bëdamboen isaidquo aidquo icpampic.

⁸Adnubien adembidi, Nidaid utsi mibi menembique. Nidtan, Nuquin Papan cac abi capuacmanombo Abadauan nidpampic. ⁹Adembidi Nuquin Papa tantiec abi capuacmanombo choash, Con nidaid iquendac, quiaish yuedacmaidbimboec quenenenquo yec daëdcaid shubumpi buan-buanequi aid nidaidën tabadpampic. Adecbidi aton mado Isactsen aid shububidi buanash tabadoapampic. Adecbidi Isaquën mado Acobotsen tabadoapampic. ¹⁰Nuquin Papa yacno ambi tantiampicpadomboen shubu uaidën tabadendabi, quequin cainec quenenenquo yec nidaidën Abadauan tabadtenepampic.

¹¹Adembidi Abadauanën Nuquin Papa tantiaquin aton chido Sada

machobudash bacuë tishtiapimbocquid icnubi, Nuquin Papan chiacpadquiec con mado iquendac, quequin tantiacpadomboen Abadauanën chidon machobudquioshon aton mado tishpampic. ¹²Adoac Abadauan tsusiobudaidënquo tsyuecquid dadpen uispatedi yampampic. Masitedbidi yanoapampic.

¹³Aden Nuquin Papan aid nidaid ëbi menendac, quequin tantiec chieshenquo yec Abadauan ambi isacmanombo choash, Con nidaid nendac, quequi Nuquin Papan meniabicnuc quenenash tabadenquo yec nidequi unëspampic. Adomboembidi tantiequi aton madobo unësbudnepampic. Adomboembidi tantiequi aton baba ado unësbudnepampic. Adomboembidi tantiequi aidon tsyuecquido unësbudnepampic. ¹⁴Nuquin Papa tantiaquid yec Nuquin Papabëd tabadendabi, quiaish nidaidën quenenenquo yec aidtedi tabadpampic. ¹⁵Ëbi tishondacnombo tantiec unësquio iquebique. Ambo nidoaibi, quiaish nidtsempampic. ¹⁶Adenquo yec, Nuquin Papa yacno tabadendabi, quesho tantiaish, Con matses nec. Adecbidi aton Papa nebi, quequin chuishun abi yacno abëd tabadte shubu uapampic Nuquin Papan.

^{17,18}Mimbi tishmiaidën tsyuecquid dadpen iquendac, quequin Nuquin Papan chiaid abimbo iquec, quequin Abadauanën tantiaquiopampic. Aden tantiaisho isun, Ëmbi chiaid tantiaquidquioda Abadauan neque. Isnu, queshun, Mìn mado abentsëc Isac caid cuesuneshun ëbi tantiaquin taita, Nuquin Papan cac Nuquin Papan chiaid niacmane queshun Abadauanën tauinuequin aton mado setsempampic.

¹⁹Aden nanuequin, Nuquin Papan con

mado uincuemendac, quequin tantiaquin aton mado setsenshumbic Nuquin Papan istuidmiaid, obeca bënëded seshun tauipampic aton mado uincuen uaidbimboecquid icnuc.

²⁰Adnubien adembidi Nuquin Papan chiaid tantiaquin Isaquën aton mado abi ushëmbi tishaid daëd Acobobëdta Esau Nuquin Papan ambi chiacpadomboen nanun bëdambo icmete chiaid chuioapampic.

²¹Adnubien adembidi Nuquin Papa tantiaquin tsusio budash unësbudquimbi aton cuate bedash shuebudshun, Nuquin Papa bëdambo iquec, quequin Nuquin Papan ambi chiacpadomboen nanun bëdambo icmete chiaid aton baba Osen bacuë daëd Acobon chuioapampic.

²²Adnubien adembidi Osen Equipito yacno tabadec unësnun, Nuquin Papan nidaid menenun nabono, quequin chiaid tantiequi unësebique. Mibitedi: Aid nidaid yacno nidnu, qeshun con canite buanta, quequin chuioapampic Osen.

²³Adnubien adembidi Nuquin Papan bëdambo icmiaid con mado nec, quequin tantiaquin aton mado Moises tishun aton titan aton papabëdtambi ompopampic. Equipito yacnocquid ancanquidën: Isadaidbon chidon dada bacuë tisho cuesuneta, quequin chiaid niacquid dacuëdenquiocquin aton mado adopampic.

²⁴Adnubien adembidi Nuquin Papa tantiec Moises caniacsho, Ancanquidën champin mado mibi nec, caqui chieshë nec, Aidën madopenquio nebi, queoapampic. ²⁵Ancanquid Nuquin Papa tantiesa nec. Con matses isadaidboen Nuquin Papa tantiaquido nec. Adquid icsho aidobëdtabi ancanquidën mëyanaid iquendabi, quianec Moises cuëshëdpampic.

²⁶Yuecshun Nuquin Papa yacno yuedac

bëdambo iquendabi, quequin tantiaquin Equipito yacnocquidon shubun yuedshun meniaid isuidec, Natiaic icsatiapimbo iquebi, quiaish tabadquin Moisesën cainpampic. ²⁷Adembidi tantiaquin, Equipito yacnoësh ëbi nidsho isash nëishun ancanquidën con matses nidmenquio icpec, quenquio yec Nuquin Papa isacximboec Moises tabadtenepampic. ²⁸Yuecash Equipito yacno choashun adembidi tantiaquin, Bëyuec tishaid unësmetequid ëmbi ëbi yacnoshon uaid mayan bëda ëmbi budmiaid min shubu datamenuen ëmbi chiacpadomboen nabanta, Nuquin Papan cac ambi chiacpadomboen naquidquio Moisesba icpampic. Ambi chiacpadomboen nabanquin nidaidën capuquid yua cuesuneshun shëcuë cuëmano abiuc daëdi abucbëdta intaquën ëcnoshcashun nami shuishun pan bidisquesabëdta pepampic. Adoacsho isun Nuquin Papan budmiaidën datampampic.

²⁹Adnubien adembidi Nuquin Papa tantiec Equipito yacnoësh puduanec nidquin Acte Piu potec nidquid podqued nibëdboedi tanunquiocquidën uesadmiadën isadaidbon potepampic. Aden isadaidbon potenubi abëdtambi potenuc abi chieshënquido Equipito yacnocquido acte chomiadën mentoadbudnepampic.

³⁰Adnubien adembidi Nuquin Papa tantiec ambi chiacpadec matses utsi dadpen tabadacno Edico caid dacuenadtanepampic. Siete yacno cuëscain tambanec dacuenadtanec shubu dadpen daquënë uain tsasi uaid sec uebudpampic.

³¹Adnubien adembidi Nuquin Papa tantiaquin Edico yacnocquido cuesunenun isquido isadaidbo chosho isun, Nuquin Papan matsesbo nec. Aido ëmbi yuedac ëbëd icquido

cuesunenquiocpec, queshun dadpen chudmequidën, Daba caidën, isadaidbo aton shubun yuedquin ompopampic. Adoac nidoash aton matses utsibobëd abia choquido choash Dababëd icquido cuesunianenquiocpampic Nuquin Papa tantienquo yec chiesho Daban matses utsibo cuesunequimbi.

³²Adecbidi Nuquin Papa tantiaquid dadpen icpampic. Nëidic Edeon, utsibic Badac, utsibic Sanson, utsibic Ecte, utsibic Dabid, utsibic Samued, utsibic Nuquin Papan nadomboen nanun nabono quequin chiaid chuibanquidtedi adquidtedi icpampic. Utsi dadpenshun Nuquin Papan chiacpadomboen naindac, quequin cainquido icpampic. Abitedi chuitiapimbo iquebi. ³³Aido utsin-utsinquien: Abi ancaidobëdtabi ancanquid Nuquin Papa tantiesa nec, queshun cuesunepampic. Adembidi, Mibi bëdambo icmenu, quequin Nuquin Papan chiaid tantiaquin cainec adquidquo icpampic. Adquid icsho isun, Pemenu, queshun bëdi nibëdquid deon caid tabadacno buanshun nebudpampic. Adosho isun piantiapimbo noc Nuquin Papan quiuëccac deonën penquiocpampic. ³⁴Utsin-utsinquien adembidi Nuquin Papa tantiaquid icsho, Nëdëncashun tauinu, cac taboadaidën pichiquenquiocquid icpampic. Adembidi tantiec utsi-utsiec chështen senuesho isun mënchicquin cuemepampic. Adembidi tantiequi dayacquiocpimbocboedi dayacquiocquid icpampic. Adembidi Nuquin Papa tantiaquin matses utsibon sondado cuesnanuequid choacsho cuemepampic. ³⁵Adembidi utsin Nuquin Papa tantiaquin nianten bacuë unësboed uincuemetanquin ani menepampic. Adembidi tantiec tsadsho isun Nuquin Papa tantiesa nebi, camenuequin

shoyombededtsëcquien cuesuniaqui, Nuquin Papan chiaid tantesa uainquo yec Nuquin Papa yacno nidebi, quiaash unësampic. ³⁶Utsi-utsien shocosh bucun mëtaneshun quënën nauedacsho isun mamënsnunquimbi cueshcanten cuesaqui Nuquin Papabëd tabadte tantiec dacuëdenquo yec tsadpampic. ³⁷Adembidi utsitsen cuënoten seshunepampic. Adembidi utsitsen sënten nacsënsnunepampic. Adembidi utsitsen nidaidën capuquid bitsi nacnenaïd dasiuidpampic. Aton na nibëdnubi mëyanaqui Nuquin Papa tantiaquidquo yec aïdtedi tabadpampic. ³⁸Nuquin Papa chieshënnquid ëbëd tabadtemaïdo nec, quequin tantiec adpampic. Adoac quenentiapimbo yec uano tabadnubien nidaïd shëcuë uaidën utsi tabadpampic.

³⁹Aïdtedishun, Ëbi yacno mibi chuibanec ëbëd onquequid bëyucanec yuedanquid iquendac, quequin Nuquin Papan chiaïd tantiaquin cainec aïdtedi unësbudnepampic. ⁴⁰Aïdtedi icnubi abi icsaïd bedshunash abided cuidadec unësash uincuenash abi yacno nidoash Yuedanquid Abentsëcquiobi Esuquidistu yanabi icpampic adboedëmbi ma nuqui nëbi icquidobëdta yuedpanuna.

Aton bacuë Nuquin Papan dayacmenuequin namiaïd

12 ¹Aden Nuquin Papa tantiec chieshesa dadpen icpampic, quequin dada uasho isun ëbi chieshtometequid utsi ëbi icsaïdbëdtabi nainquiocquin ënuna. Adembidi dayacquiocquin Nuquin Papan chiacpadomboen nabanec tabadnuna. ²Esuquidistu, abitedishun icbombo abia yampidquo ëbi chuibanec Nuquin Papabëd onquec bëyucanec abi yacno puduedash yuedanquid nec, quequin tantiaquin aid isacbimboen adonona.

Aidi, Ēbi yacno matses yuednu, quiash aton Papabēd tabadteneboedi matsesash icsambocquidbimboecnuc cuesten dectanac chieshenquoio yec unēsasho uincuen uaid yanash aton Papabēdi Icbombo iquec. Aidquoio tantiec isacbmboec nidaidēn nuquibi tabadnuna. ³Abi chieshēnquidēn natiacquin mēyanaqui chieshenquiocquid Esuquidistu icpanēdash, quequin aid tantiec ma chieshtoenquoio icpanuna.

⁴Ēbi icsaid padpiden nainquoio icnu, quesumbi natiatequid icnuc mimbi ēnambo iccoc. ⁵¿Con bacuē cain Nuquin Papan mibi dayacquio icmenuequin chiaid bēpiscudecta icco? Nad iqueque. Tantia:

“Abuido, min Icbon dayacquio icmenuequin chiaid cacuidenda. Adecbidi ambi natiamianquiopec camiaid icash chieshenda.

⁶Ambi matiamianquiopec camiaid dayacquio icmenuequin nametequid con bacuēbo nec,” quequin Nuquin Papan chiampid nec.

⁷Natiatequid mibi dayacquio icmetequid nendac. ¿Ēbi cudasaidquoio con mado dayacquio icmenuequin namebanesa nebi, quecta aton papa icpadic? Padenquoio. Ambi: Con bacuē nec, caid natiatequid icnuc, Dayacquio icmenu, quequin ancaquin chono uaic.

⁸Natiatequid icnuc ambi dayacquio icmenu quequin namiaidpenquoio yec, ambi, Con bacuē nec, caidpenquoio mibi nec. ⁹Ēnden dayacquio icmenu quequin mibi ancaquidēn mibi tishmequidēn chiacpadomboen natiatequid icnuc naquidquoio mibi icpondac. Nēbi Nuquin Papan dayacquio icmenu quequin chiacpadomboen natiatequid icnuc naquidquoio icnuna abēdi tabadnuen.

¹⁰Abi tishmequidēn ambibi tantiacpaden dayacquio icmenu

quequin aton bacuē yuen nametiapimbo iquec unēsendac. Padnuen Nuquin Papan abipadquid icsaisa icmenu quequin natiaquionoc nuqui namendac. ¹¹Adoac nuqui natiaquiequec tabadec.

Adoaidi yuecash nuqui bēdamboec tabadendac. Adecbidi natiatequid icnuc dacuēdēnesa nuqui yanec. Adecbidi Nuquin Papabēd icquid nebi, quequin tantiaquidquoio yec natiatequid dacuēdēnesa nuqui yanec.

¹²Aden tantiec dayacquio ictiapimbocboedi: Abipadquid iquendabi, quiash dayacquio yec tabadta. ¹³Adenuidi naic tabadquin utsibo isme ma dayacquio ictiapimbocquin niaquec cuēshēdte bumboedi bēdambo yampanuna.

¹⁴Aden naic tabadec utsibobēd bēdamboec tabadnu, quiash adec tabadta. Adecbidi Nuquin Papa icsaisa yacpadquiequec nuquibi icnuna, quiash aid tantiec tabadec isnanec chuinanec adquid yanta. Adoesa Icbobēd tabadtiaipimbocquid nendac. ¹⁵Nuquin Papan bēdambo iquebi camiaid icboedi chiesho isun, Mimbi icsamboec tabadeque. Mibi icsamboec tabadquin ismiac utsibo icsabudtsiashe. Bēdamboec tabad, quequin chuiban.

¹⁶¿Ada aton chidopenquoio chudquid icpec? Adecbidi, ¿Ada adembidi aton bēnēpenquoio chudmequid icpec? quequin isnuequin adquid istuidshun Nuquin Papan chiaid chuquin bēdamboen tabadmeta. Adembidi, Esaupadquid icnushe queshun ¿ada Nuquin Papan bēdamboen tantiaid chieshēnquin isuidquid icpec? queshun Nuquin Papan chiaid chuiban. Natia bundoshon aton utsi Acobon codocaid isun bednun Esaun: Unēsnnun tsusio icquin con pan bēdamboen tantiaid chuisho mimbi tantiaid, quequin aton papan bēdambo icmenu quequin chiaid

chieshquin Esaun tantienquiocpampic.

¹⁷Yuecshun, Aton utsi Acobo aton papan chuibanosh, quesho tantias shubiquin, Mimbi bēdamboen tantiaid ēbitsen chui, papa, cac chuitiapimbocquidēmbi, Ēnden nibēdquiocnoc uesquin min utsi chiombi, quequin Esau chuipampic aton papan.

¹⁸Adembidi, Nuquin Papan nadatiambocquin uabanaid tsusedpabon isampicpadomboen mimbi isabiccoc. Macuēsh Sinai caid yacno choshon aidon isbenampid nēid iquec: natia nēdēnquedote; utsibic, inchēshac bimboec isadquid; utsibic, cunquequid dapabimboec isadquid;

¹⁹utsibic, shocosh shoncaten shoncabimboec onquenuc pabiate paēmbošē icpampic. Adece onquesho tantiasun, Papa, mibi onquesho tantiac dacuēdampambo iqueque. Mibi chuitequid Moises icme, capampic.

²⁰Adece macuēsh yacnombo icquin:

“Ēmbi nadatiambocquin uabanaid ismenubi macuēsh yacno anoentsēqui choenda. Adecebidi matses adecebidi nidaidēn capuquid. Anoentsēqui choquid cuēnoten setequid nendac,” quequin chuipampic Nuquin Papan.

²¹Aden Nuquin Papan nadatiambocquin uabansho isash: “Dacuēdampambo iquec, quiash, Dacuēdebi,” queopampic Moisesen uēdēquec.

²²Mibien dacuēdenquio yec Macuēsh Sion cashumbic Edusaden Chuca Bēdamboquid caid Nuquin Papa ēnēdesambo tabadacno choac bimboec mibi tabadec caimbi. Aid nuntan Nuquin Papan abi yacnoshon ambi uaid mayan bēdabo tambantiapimbo yec dadpenquioshē tabadec. Aido, ēmbi nashunaidtedi, Esus tantiaquid chotequid iquec, quiash bēdambo iquebi, quec cuēdēdonec tabadendac.

²³Abi tantiaquidtedi Nuquin Papan bacuē icbo yacpadquiec aton shubu abentsēquēnuēshi Icbobēd onquec ēnden mibi taēpoc. Aidi mimbi naid cuidquid ambi chiacpadomboen nadenequid mibi unēsesa icsaisabidi icmequid Nuquin Papa nec. Aidbēd ēnden tabadac bimboec abēdi onquec mibi taēpoc. ²⁴Abēd icquin Nuquin Papan ambi ēnden chiaid ēmeshun ambi nēbi chuioid, mibi chuibanec aton Papabēd onquec bēyucanec yuedanquid Esuquidistubēd ēnden mibi onquepoc. Mibi icsaid bedshunash abided cuidadec unēso isun cudan siac intac chiuidnēdaid tantiec aidbēdi mibi onquepoc. Abedēn nidaidēn capuquid yua cuesuniampicpadquidēn intac chiuidec unēsaid tantiec Icbobēd mibi onquetiapimbo iquec.

²⁵Nuquin Papan chiaid niacchitomane quequin isquiota. Macuēsh Sinai yacno choquid Nuquin Papan ēnden chiaid chuiquid tantiate bunesa cuidpampic. ĒAdembidi ambi nēbi chiaid abi yacno yuedanquid aton Madombo Esuquidistu tantiesa Nuquin Papan comapenen cuidenquioda icpadic? ²⁶Ēnden Macuēsh Sinai yacno Nuquin Papan chiacnoshonquio nidaid ishcumpampic. Nēbien: “Padpidemboen nidaidbēdta abu ēnēdmēnuen ishcunoaindami,” quec Nuquin Papa. ²⁷Aden chuiquin ambi uaidtedi ēnēdmēnuen padpidemboen ishcunoaindac abi yacno choaidtedi icsaisa icmiaindo yec ēnēdtiapimbo iccuedednuc.

²⁸Adoaidi Nuquin Papabēd abi tantiaquido ambi bēdambo icmiaindo yec abēd tabadte ēntiapimbocnoc Nuquin Papan nadatiambocquin nabanaid tantiec cuēdēdonec tabadta. ²⁹Nadatiambocquid Icsaisabidi icquin aidēmbi, Esuquidistu tantia, quequin nēbi chiaid tantiesa chian anēdēnquequid nēsecaindac.

Nadomboen nata cain chiaid

13 ¹Esuquidistu tantiaquid yec aid tantiaquidtedi con utsibo nec, quiash tantiananec nashunanta.

²Adembidi Nuquin Papa yacnoësh choquid abi tantiaquido nashuntequid ambi uaido mayan bédabo chosho yuedampicpaden mimbi isacmaidquio Esus tantiaquid chosho yuedta.

³Adembidi quënën nauedaid iquec utsi iste buntsiabi, qeshun quënën nauedaid istan-istanta. Adecbidi buntsiabi, qeshun menetan-menetanta. Adembidi utsin mëyanaid tantiec shubioata.

⁴Adec tabadec con chidopenquio chudnu quesa iquec chido utsi isuidquid icta. Adesa icsho Nuquin Papan mibi cuidendac. ⁵Adecbidi, piucquid con na bedtequid dadpen bednu, quec bunquiduidi iquenda. Adesa iquec: Con na icnuc bédambo iquebi, quec tabadta. Adec tabadquid Nuquin Papan ënden dada uamiampid naden chiech:

“Mibëdi iquebi.

Nianenquiocquin mibi dayun uanuna.”

⁶Adsho tantiash:

“Con Icbombo ëbëdi iquendac.

Aidëmbi ëbi cudasquin dëcatiac chieshëmënnquid dacuëdënenquio iquemi,”

nuqui quendac. ⁷Adembidi nidaidën icquid mibi chuiquid dapabo Nuquin Papan chiaid mibi tantiamenuequin chuiquido bëshunenda. Aido Esus tantesa uainquio yec bédamboec tabadpanëdash. Aido tanec bédamboec tabadoata. ⁸Con Icbombo Esuquidistu nec. Abia Yampidquio yec nëbi adquiobidi iquec. Aidi ënëdtiapimbo yec abi tabadec.

⁹Adquid Esus icnuc Nuquin Papa chieshënquidën chuisho tantiesa icta.

Aidën naden chiech, Nëid petequid icnubi nëid utsi petemaid nec, quequin chiech. Mimbi piaidën mibi bédambo icmetiapimbo iquec. Padnuen matses icsaid bedshunash abided cuidadquidën, Nuquin Papan madonquio paucaid iquebi, quequin tantiaquidquio icsho isun Icbobëd tabadmequin ambi bédambo icmiaidquio nendac. ¹⁰Matses icsaid bedshunash abided cuidadash uincuenash abi tantiaquidbëd ënëdenquio yec tabadquid Esuquidistu nec. Adec tabadquid Esuquidistu icnubi, Matses icsapash, qeshun nidaidën capuquid yua cuesuneshun nibëdquiocnoc tauiaidënquio matses Nuquin Papabëd tabadmetiapimbo iquec. Adembidi aidënquio nuqui icsaisa icmetiapimbo iquec.

¹¹Isadaidbo icsapash, qeshun nidaidën capuquid yua cuesuneshun aidën intac bedshun, Nëid intac Icsaisa Bëdaidquio anquënë uaid nuntan buanshun daseccacsho isun abi yacno puduedacbimboecsho Nuquin Papan isadaidbo isec, qeshun nuntan buanshun daseccapampic. Adnubien matses nibëdacno nami buanshun uesquin tauipampic. ¹²Adembidi matses tabadenquio yacno Esus buanshun dectanac unësacsho siac aton intac chididiepanëdash nuqui icsaisa icmenuec. ¹³Adoaidi abi tantiaquid yec abëd icquid nebi, quequin ënden chiampicpaden nainquiocsho isun isadaidbo Esuquidistu tantiesan cacumiaqui chieshenquio yec tabadta. ¹⁴Adquid iquec nidaidën yuec tabadesa icquimbien Edusaden Chuca caid Nuquin Papa ënëdtiapimbocquidbëd tabadaid cainquidquio nuqui nendac.

¹⁵Matses icsaid bedshunash abided cuidadquid Esus Nuquin Papan icmiac, quequin tantiaquin, Mibi bédambo iquec, quequin Nuquin Papa

chuidenenuna. ¹⁶Adodenequin
utsibobēd tantiananquin nashunquin
aton na nibēdquid menequid icta. Adsho
isash, Con mado yec con champi yec
quec bēdamboec tabadquid nec, quiash
bēdambo iquebi, quependac Nuquin
Papa.

¹⁷Ambia Esus tantiashun chuiquidon
chiacpaden nabanta. Nuquin Papan, Ēbi
tantiaquid utsibo isbanta caid icquin
aido Nuquin Papan, Icsambo iquec,
canushe queshun isted-istedec. Aidon
chiacpadomboen naquin ma aido
bēdambo iquebi camepanuna.
¿Chieshecta mibi bēdambo icpe?
Padenquio.

¹⁸Chieshenquiocquin ēbēd icquid
Nuquin Papa chui. Bēdamboen nabanec
tabadteniobi. Adequi tabadebi utsibo:
Icsambocquid nec, quetiapimbocnoc.
¹⁹Adembidi ēbi tantiaquin Nuquin Papa
chuidoneta. Mimbi adonoc badedquio
mibēd iquendabi.

²⁰Adembidi utsibēd bēdamboen
tabadmequid Nuquin Papan aton
Mado matsesacsho utsibon unēs
uashun siacsho isun uincuemiāc

bēyucanec abuc puduedoash
abitedishun Icbombo nec. Abi
tantiaquido chuinen yuedquid aidi
Nuquin Papan icmepanēdash.
²¹Adquid Esus icmeshun ambi
tantiacpadomboen ma Nuquin Papan
mibi icmepanuna. Adoac, Ēbi
puduedmenuen Nuquin Papan naid
nec, quequin ēnenquiocquin chuiquid
ma icpanuna.

²²Mibi tantiamenuen ěmbi dada
uaquin chiaid daēdpactsēcquio icsho
bēdamboen isec onquequin
tantiadoneta.

²³Nēbi utsi chiembique. Tantia.
Timoteyo quēnēn nauedboedi nēbi
puduemiāc aid badedquio nēmbo choan
aidbēdi mibi yacno nidendabi.

²⁴Mibēd icquid Esus tantiaquid
utsibobēdta mibi chuiquidtedi tantiec
tsadebi quequin Pabadon dada uaosh,
quequin chuita. Adecbidi ēbitsen
tsadebi quequin chuioata, queoapēc
nēuēsh Itadia yacno tabadquido.

²⁵Nuquin Papan bēdambo icmiaid ma
mibitedi icpanuna. Padi. Aidtedi dada
uaombi.